

BUSINÀ 87°

2011/2012

(Bellinaso Fabio – Raiteri Pier Luigi)

Buna sira, buna sira cari siuri! E ben c'mè c'la va? A son pròpi cuntent ad vigvi, e con ist i son utòntasét, utòntasét ani c'a fuma 'sta Divòta Cumedia. Mé a aurisa piantè lé, ma ormai chi an Italia us ries pù a andè an pension; macchè, tücc j'ani i n'anventu jëina nova: prüma u scalone, pó' el fnèstri ch'i son dventà di fnèstren semper pù cit. S'a pens che l'atra smòina, parlònda del pension, a s'è bütaja a piònsi ònche la Ministra (*Fornero*), fighirumsi se c'a duvuma fè nuiater!

I disu che la vita media la ven pù longa: sé, però um l'a meja urdinà u dutur c'l'a dev esi pù grama!

A pruposit ad dutur, um vena 'n ment ad cul monsü ch'el va dau dutur per fès visitè e a la fen ui ciama: "Se c'ai dev dutur?". "Ch'el uarda, i son sent euro; se c'ai dev dì, a j'uma da vivi ònche nuiater...". Lü ui da i so sent euro e el va an farmacia e, ònche lé, ui dis: "Se c'ai dev dutur?". "I son tüti medseini senza mutua, an tüt sent euro; se c'ai dev dì, a j'uma da vivi ònche nuiater...". Cul omi u riva a cà, u dróba la fnestra e u trà zü el medseini e u dis: "Se c'a dèv dì, a j'hó da vivi ònche me!".

Che però, um ven da pensè che sé, sta vita la dventarrà semp pù longa, ma la smea semp pù chërta perchè us va semper pù ad cursa e u temp u s'a schër-sa. Us mea che tücc j'abu prësia e che ansën a l'aba pù voja ad spiciè. S'it telefonu e 't fai sunè du vòti an pù, quòndi che 't rispondi, prüm afari ch'it ciamu a l'è: "Ma andó 't eri?". "Ma c'mé! A j'era an cà, a son andacc in mument au cesu!" "E anlura, in'atra vòta, fa pù sgagià!"

Fin al futugrafij i venu semper 'mosse', perchè la gent a l'ha pù u temp ad bitè-si an posa!

E j'ei vist: ormai el Nadal il fòn c'mensè semper prüma: i c'mensu el scoli e 't trovi zà i panaton ant i negosi; quasi quasi, in atr'ani, la prüma ad Gelindo a la fuma u dì di mort au simiteri e us na parla pù!

Uardè che ist a l'è pròpi in ani particular: me a cumpis utòntaset ani, i Grigi sent'ani e l'Italia sentsinquònta: a pruposit, speruma che, da chi a cuc ani, a seju turna bon a vensi cuc campionà, perchè tra i Grigi e u Rating d'Italia, a suma semper an C2!

Se perchè da quòndi c'a suma entrà ant la crisi, la gent a l'è amnia mata! Na vòta se a t'ancuntravi in tò amis, at parlavi dla famija, dla presion, o del colesterolo, adès no! L'ater dì a j'hó ancuntrà el mè amis Cicotu c'a l'era sagrinà e a j'hó dicc: ma a stat nént ben? E lü um ha rispundì: "Lasmi stè va, che a

j'hó i bund ad travers. Ieri im son girà i Bot quòndi c'a j'hó savì che u spread um era andacc a singsent e a sava pü c'mé fè a crumpè el pòn da mangè!". Oh zà, perchè la gent a l'ha pü meja 'd sold da spendi. Pensè che l'ater di a son entrà ant in bar a ot uri la mateina e u j'era in òmi setà au taulen c'l'ha ciamà in grapen e u l'ha buì; pó' u n'a ciamà in ater, pó' in atr'ancura. Quòndi c'u riva a ses, el barista ui dis: "Munsü, c'l'aba pasiensa, ma a l'è ot uri la mateina e lu l'ha zà buì ses grapen, me a son an pò' preocupà...". E cul omi ui dis: "S'i sei preocupà vuiater, pensè an po' a me c'a j'hó ammachi in euro an sacocia!".

Ònche se an mèa a cui ch'i fòn na fadeja d'asident, u j'è semp cui là ch'i fòn i dritu. Pensè che da quòndi che is govern nov a l'ha bütà la tasa an si yacht, i j'hòn zà dicc che per 'st'istà i son preocupà che el bulen neier per el coui il bitarròn pü an s'l'autostrada, ma ant el mar, per cui là ch'i devu purtè el bar-chi fora da l'Italia!

Eh sé, perchè ist ani u s'è anversà el caudron an Italia, el cavalier a l'è cascà da cavà! El Cavalier u s'è lamentà, perchè a l'a dicc che ui tucava semp curi ammach cun di asu, e che tucc i s'la piavu ammachi ansèma a lü e ch'il capi-vu nénta né in Italia e gnònca in Europa. Ma dzim an pò': voi i j'eri cunvint che Sarkozy e la Merkel i rijvu perchè ch'i j'eru preocupà per l'Italia? No! U j'era amnì ant la ment na barzelèta che Berlusconi ui j'ava cüntà la smòina prüma au G8!

El problema a l'è che la pulitica an Italia a l'è cula c'a l'è. I disu che i pulitic i servu a niente: a l'è nént veira: piè Fassino, per esempi, ch'i l'hòn drubà per amsurè la piena del Po a Türen! Fini u so 'Futuro e Libertà' ul vigg ammachi setà ansüma au so cadrighen a la Camera. Bersani, Di Pietro e Vèndola i son semp là a Vasto, perchè ui ven nént ben la futugrafia: a vot vighi che la prossima vòta ui va sü Casini che, dicc fra noi, u nòm a l'è za na garansia! Speruma ammachi che in Italia dai Monti a pasuma nénta ai Tra-monti! Ònche perchè, j'ei vist che pastis: 'no global', 'black bloc', pó' 'indignados': i cambeju nòm, ma andó ch'i rivu, i sciapu semper tüt!

E se pó' a uarduma a Lisòndria, u j'è pòc da rej! Ist ani, u Sendich e i Asesur la letterina i l'hòn ricevia lur da Babbo Nadal, c'a l'ava d'absogn tròntanov milion ad rigal...: speruma ch'is bütu d'acòrdi cun la Befana e ch'i la ròngiu. Na bela nutisia per noi, a l'è che dòp tònc ani a j'uma turna in minister ad Lisòndria: Renato Balduzzi, che el ven tücc i ani a vighi la nostra cumedia. Ist ani, a pens c'l'aba del ròbi pü ampurtònti da fè, ma a voi salüteli e fèj i me auguri ad bon travaj ansema a voi!

C'mé tücc j'ani, an sità u j'è in mügg ad nuvità. An gir i j'hòn cambià tücc i lampion: i j'hòn bütà sü cui LED, ch'i fòn in sciaron d'asident, acsé at vighi pü ben c'u j'è pü ansèn an gir ad siral!

Pó' a suma tra i prüm ad avei l'asfalto antismog an tèra. El vò dì che i c'men-

sarròn a fè el strà per cui ch'i fümü nénta e culi per i fümador; ant isti, al post di tumben, jën sé e jën no, i bütu in posacenere!

E u smeja ch'i voru turna drubì u teater, perchè i j'hòn dicc che el poltrouni i j'hòn mangià l'amianto da bèli e sulì!

U j'è da dì che, però, a suma propi adventà na sità muderna. L'ater dì a j'era an gir, a j'hó vist in òmi con in triciclo e am son dicc: a vot vighi che Cercenà el va turna an gir con u só carèt di gelati? Ai son andacc dauvsen e a j'hó ciamà na cupëtta crema e ciculàta: ammachi che cul ater là u m'ha dàcc in sachèt per l'organico! Adès c'ù j'è an pòr ad crivéla, i j'hòn c'mensà a mandè an gir i spasen con u triciclo; a l'è che i j'hòn dacc acsé in nòm... 'SpazzaCity': che mania 'sti nom ingleis. Ma a digh, i pudivu nént ciamèj, se c'a so, 'gava l'armenta'?!

Ma l'impurtònt a l'è che finalment j'hòn c'mensà i travaj an s'el pont 'd la Sitadéla. Per adès i j'hòn bütà sü na baraca e i j'hòn dicc ch'i bitarròn la prüma prea a febrar; eh, voi i disì c'a l'è pasà in mügg ad temp: per forza, me a l'hó vista, a l'è grosa, bütà sü ista, mès pont a l'è facc!

Però s'i riesu nénta a finili sgagià, i j'hòn zà vist che suta al pont 'd la Sitadéla ui pasa el Tunnel 'd la Gelmini, cul ch'el va da Ginevra al Gran Sasso: mà c'la vaga, i fòn sòrti i neutrini e i fòn pasè el machini! Ma j'ei vist el prugèt? I j'hòn dicc ch'i farròn na piasa ònche suta al pont, la piasa 'ipogea'. I j'hòn dicc c'ù sarà in post che te 't vai là e at trovi semp cumpagnia: sé! rat, quaiaster e sansos, uà che bèla cumpagnia!

A l'è cambià el guvern ònche chi dai frà. U j'è cambià el pruvincial, el guardiòn e l'asistent; a pruposit, a salütuma frà Tonino, frà Giuseppe e frà Roberto. E i sei c'mè ch'i fòn quòndi c'ù s'anversa el caudron: i voru sübit cambiè cuc cosa e frà Tonino u s'era büta ant la testa ad dei na mon ad culur a la curt. A l'è ch'l'ha facc in appalto europeo e a l'ha ciamà trei preventiv e i son rivaj tre ufèrti. Cula d'in tudesc c'ui ciamava treimila euro, pó' cula d'in franseis c'ui ciamava sesmila euro e cula d'in italion: novmila euro. Lü el capiva nénta is diferensi, e anlura u j'ha ciamà per savei el mutiv d'is diferensi. U tudesc ui dis ch'el vó drubè na vernis ecologica c'l'a custa mila euro e che lü ui vò dèj du mòn, e che pó' tra ampalcadüra e pnèl u dev spèndi ater mila euro e u rèst a l'è u so guadagni. El franseis ui dis che lü a l'è el biònchen pü an gòmba c'ui seja an gir, ch'el droba na vernis au champagne ch'el vò dèj trei mon: el biònc el ven treimila euro, pó', tra ampalcadüra e pnèl, ui na va ater doimila euro e j'ater mila i son u so guadagni. A la fen ui riva l'italiòn, e el frà ui dis: "A t'hó ciamà ammachi per curiosità, perchè u tó preventiv a l'è tròp pü out che j'ater". E lü ui dis: "Tonino, el mè a l'è ad sicür el preventivo miglior, stam da senti: treimila euro i son per te, treimila i son per me e treimila ai дума au tudesc ch'el fa u travaj!".

Avei pasiensa, ma prüma ad finì auvriva nént smentièmi ad frà Siro, c'um ha

lasà pòc temp fa. Lù a l'è stacc u stilista ad Gelindo e a l'ha facc tücc i costüm: ater che Dolce e Gabbana! Uardè che plisa c'a j'hó me! Adès ad sigur a l'è an Paradis ch'el cüs el vesti a j'òngel e auvriua fèj in bel aplauso ansèma a voi per ringrasièli ancora na vòta.

Va ben, adès a la piònt lè ad fè la predica, ònche perchè a l'è nénta el me mesté, e av present la me famija...